

Obama tiada rancangan temui Anwar
MalaysiaKini.com
Apr 20, 2014

Pertemuan dengan ketua pembangkang Datuk Seri Anwar Ibrahim tidak menjadi sebahagian daripada jadual lawatan Barack Obama dalam kunjungan presiden Amerika Syarikat itu ke negara ini pada hujung minggu depan.

Laporan AFP yang memetik kenyataan penasihat keselamatan AS Susan Rice menyebut walau Obama tidak membuat pertemuan itu, ia bagaimanapun mungkin berlangsung dengan pegawai lain.

“Saya fikir presiden mungkin tidak membuat pertemuan (dengan Anwar) – mungkin ada pertemuan di peringkat lain,” katanya seperti dipetik dalam laporan itu.

Kunjungan Obama itu berlangsung hanya sebulan selepas Anwar disabitkan kesalahan di Mahkamah Rayuan dan dijatuhkan hukuman penjara lima tahun atas tuduhan Liwat II.

Anwar kini masih bebas selepas dibenarkan untuk menanggungkan pelaksanaan hukuman, sehingga kes diputuskan di Mahkamah Persekutuan.

Beberapa tokoh utama AS mengkritik kerajaan Malaysia apabila Anwar dibicarakan atas tuduhan liwat untuk kali kedua pada 2010.

Bekas naib presiden AS Al Gore dan bekas timbalan setiausaha pertahanan negara itu Paul Wolfowitz menyifatkan kes berkenaan sebagai tuduhan yang “direka-reka”.

Pentadbiran Obama bagaimanapun tidak memberi pandangan rasmi berhubung kes tersebut dan lebih menumpukan kepada usaha menjaga hubungan baik dengan kerajaan Malaysia.

Kunjungan Obama ke Malaysia merupakan kunjungan sulung oleh seorang presiden AS dalam tempoh hampir setengah abad.